

"Član 121.

(Sastav policijskog odbora)

- (1) Policijski odbor se osniva kao nezavisno tijelo koje čini pet članova, od kojih jedan član ima saglasnost Sindikata policije, jedan član iz reda aktivnih policijskih službenika pri Upravi policije Kantona Sarajevo, jedan član u statusu penzionisanog policijskog službenika, te dva člana iz reda građana.
- (2) Članove Policijskog odbora imenuje Vlada Kantona Sarajevo, a biraju se putem javnog konkursa koji raspisuje Vlada Kantona Sarajevo. Komisiju za izbor članova Policijskog odbora imenuje Vlada Kantona Sarajevo.
- (3) Članovi odbora biraju se iz reda istaknutih stručnjaka iz oblasti pravnih nauka, sa najmanje pet godina radnog staža nakon sticanja visoke školske spreme, a predsjedavajući odbora mora imati najmanje deset godina radnog iskustva na pravnim poslovima.
- (4) Član policijskog odbora može biti svako lice koje:
 - a) je državljanin Bosne i Hercegovine;
 - b) ima stečenu diplomu visokog obrazovanja ili druge obrazovne ili akademske kvalifikacije najmanje VII stepen stručne spreme, odnosno visoko obrazovanje prvog ciklusa Bolonjskog sistema studiranja sa 240 ECTS studijskih bodova u oblasti pravnih nauka ili druge visokobrazovne institucije pravne struke, najmanje pet godina radnog staža u struci nakon sticanja visoke školske spreme, a za predsjedavajućeg deset godina radnog staža u struci nakon sticanja visoke školske spreme;
 - c) nije član političke stranke;
 - d) nije bilo na bilo kojoj poziciji u političkoj stranci na bilo kojem nivou, niti je bio postavljen na bilo koju poziciju od strane političke stranke;
 - e) nije bilo član izvršnog ili zakonodavnog tijela na bilo kojem nivou vlasti u Bosni i Hercegovini;
 - f) nije osuđivano za krivično djelo,
 - g) da se protiv njega ne vodi krivični postupak,
 - h) da mu nije izrečena disciplinska sankcija za teže povrede službene dužnosti.
- (5) Policijski odbor se imenuje na mandatni period od četiri godine.
- (6) Članovi odbora mogu biti ponovo birani u Policijski odbor samo jednom uzastopno.
- (7) Najmanje šest mjeseci prije isteka mandata pokrenut će se procedura za izbor novog Odbora.
- (8) Uredbe Zakona o ministarskim, vladinim i drugim imenovanjima Federacije Bosne i Hercegovine ("Službene novine Federacije Bosne i Hercegovine", br. 12/03, 34/03 i 65/13) primjenjuju se na izbor članova Policijskog odbora, ukoliko nije drugačije određeno ovim zakonom.
- (9) Sastav Policijskog odbora treba da odražava nacionalni sastav stanovništva na teritoriji Kantona prema popisu stanovništva iz 1991 godine."

Član 18.

(Izmjena člana 126.)

U članu 126. riječi: "šest mjeseca" zamjenjuju su riječima: "devet mjeseci."

Član 19.

(Izmjena člana 127.)

U članu 127. riječi: "devet mjeseca" zamjenjuju se riječima: "15 mjeseci".

Član 20.

(Izmjena člana 129.)

U članu 129. stav (2) mijenja se i glasi:

(2) U roku od tri mjeseca od dana stupanja na snagu ovog zakona, Vlada Kantona će imenovati Policijski odbor u skladu sa uvjetima propisanim ovim zakonom.

Član 21.

(Novi član 130a.)

Iza člana 130. dodaje se novi član 130a. koji glasi:

"Član 130a.

- (1) Policijski službenici sa činom mlađeg inspektora, inspektora, višeg inspektora, samostalnog inspektora i glavnog inspektora, koji po odredbama ovog zakona ne ispunjavaju uvjete za vršenje poslova, koji uključuju vrstu stručne spreme, a imaju stečenu diplomu visokog obrazovanja ili druge obrazovne ili akademske kvalifikacije najmanje VII stepen stručne spreme, odnosno visoko obrazovanje prvog ciklusa Bolonjskog sistema studiranja sa 240 ECTS studijskih bodova, ili druge visokoobrazovne institucije svih struka, u stečenom činu nastavljaju obavljati poslove i radne zadatke svoje stručne spreme, sa pravom na unapređenje u viši čin u skladu sa ovim zakonom i pravom na interni premještaj istog čina unutar policijskog organa.
- (2) Policijski službenici koji po odredbama ovog zakona ne ispunjavaju uvjete za vršenje poslova, koji uključuju vrstu i stepen stručne spreme, a imaju završen VI stepen stručne spreme ili visoko obrazovanje prvog ciklusa Bolonjskog sistema studiranja sa 180 ECTS studijskih bodova, ili druge visokoobrazovne institucije svih struka, u stečenom činu nastavljaju obavljati poslove i radne zadatke svoje stručne spreme, bez prava na unapređenje u viši čin u skladu sa ovim zakonom i pravom na interni premještaj istog čina unutar policijskog organa.
- (3) Policijski službenici iz stava (2) ovog člana ostvarit će pravo na unapređenje u viši čin u skladu sa ovim zakonom, ukoliko steknu diplomu visokog obrazovanja ili druge obrazovne ili akademske kvalifikacije najmanje VII stepen stručne spreme, odnosno visoko obrazovanje prvog ciklusa Bolonjskog sistema studiranja sa 240 ECTS studijskih bodova, ili druge visokoobrazovne institucije svih struka."

Član 22.

(Stupanje na snagu)

Ovaj zakon stupa na snagu osmog dana od dana objavljivanja u "Službenim novinama Kantona Sarajevo".

Broj 01-02-24858/19
19. juna 2019. godine
Sarajevo

Predsjedavajući
Skupštine Kantona Sarajevo
Elmedin Konaković, s. r.

Na osnovu člana 12. stav (1), tačka a) i člana 18. tačka b) Ustava Kantona Sarajevo ("Službene novine Kantona Sarajevo", br. 1/96, 2/96 - Ispravka, 3/96 - Ispravka, 16/97, 14/00, 4/01, 28/04, 6/13 i 31/17), Skupština Kantona Sarajevo, na sjednici održanoj dana 19.06.2019. godine, donijela je

ZAKON

**O IZMJENAMA I DOPUNAMA ZAKONA O
UNUTRAŠNJIM POSLOVIMA KANTONA SARAJEVO**

Član 1.

(Izmjena člana 16.)

U Zakonu o unutrašnjim poslovima Kantona Sarajevo ("Službene novine Kantona Sarajevo", broj 1/16) u članu 16. u stavu (3) tačka b) mijenja se i glasi:

"b) sistematizacija radnih mjesta, koja za radno mjesto državnog službenika i namještenika sadrži sljedeće elemente: naziv radnog mjesta, opis poslova, uslovi za vršenje poslova, uključujući vrstu i stepen stručne spreme, vrstu djelatnosti, naziv grupe poslova, složenost poslova, status izvršioca, poziciju radnog mjesta i broj izvršioca, dok za radno mjesto policijskog službenika sadrži sljedeće elemente: naziv radnog mjesta, opis poslova, uslovi za vršenje poslova, uključujući vrstu i stepen stručne spreme, čin, status izvršioca, vrsta ovlaštenja i broj izvršioca."

Član 2.

(Dopuna člana 21.)

- (1) U članu 21. u stavu (5) iza tačke e) dodaje se tačka f) koja glasi:
f) može da traži reviziju po određenim predmetima o čemu će obavijestiti Komisiju za sigurnost;"
- (2) Dosadašnje tačka f) postaje tačka g).

Član 3.

(Dopuna člana 23.)

U članu 23. u stavu (3), iza tačke v) dodaje se nova tačka z) koja glasi:

"z) bez odlaganja, a najkasnije u roku od 24 sata i u kontinuitetu informiše Nezavisni odbor o sigurnosnim događajima koji su uznemirili javnost Kantona Sarajevo s obzirom na način izvršenja krivičnog djela ili posljedicu krivičnog djela, počinioca ili posljedicu o čemu sačinjava i prosljeđuje pisanu informaciju."

Član 4.

(Izmjena člana 24.)

Član 24. mijenja se i glasi:

"Član 24.

(Zamjena policijskog komesara)

- (1) U slučaju privremene spriječenosti policijskog komesara (godišnji odmor, bolovanje, službena odsustva i slično) koja može trajati do 60 dana u kontinuitetu zamjenu policijskog komesara vršit će policijski službenik zaposlen u Upravi policije koji ispunjava uslove za policijskog komesara, a kojeg rješenjem odredi policijski komesar.
- (2) Ukoliko policijski komesar zbog prestanka mandata, smjene, ostavke, suspenzije ili drugih stvarnih ili pravnih razloga, kao i slučaju odsustva policijskog komesara dužeg od roka iz stava (1) ovog člana, zamjenika policijskog komesara, sa danom nastupanja okolnosti i razrješenja policijskog komesara imenuje Vlada Kantona Sarajevo iz reda policijskih službenika zaposlenih u Upravi policije koji ispunjavaju uslove za policijskog komesara, a na prijedlog ministra.
- (3) Policijski službenik koji mijenja policijskog komesara ima sva prava, obaveze i ovlaštenja policijskog komesara predviđena u članu 23. ovog zakona kao i pravo na naknadu razlike u plaći do nivoa osnovne plaće policijskog komesara ako vrši te poslove duže od 30 dana uzastopno.
- (4) Ukoliko policijskom komesaru prestane mandat zbog smjene, prihvatanja ostavke, isteka mandata ili nemogućnosti da ponovo preuzme poslove, Vlada Kantona Sarajevo imenuje novog policijskog komesara u skladu sa zakonom."

Član 5.

(Dopuna člana 26.)

U članu 26. stav (2) na kraju teksta briše se tačka i) dodaju riječi: "odnosno drugim policijsko-sigurnosnim agencijama u Bosni i Hercegovini."

Član 6.

(Izmjena člana 27.)

Član 27. mijenja se i glasi:

"Član 27.

(Kriteriji za članstvo u Nezavisnom odboru)

Član Nezavisnog odbora može biti svako lice koje:

- a) je državljanin Bosne i Hercegovine,
b) ima stečenu diplomu visokog obrazovanja ili druge obrazovne ili akademske kvalifikacije najmanje VII stepen stručne spreme, odnosno visoko obrazovanje prvog ciklusa Bolonjskog sistema studiranja sa 240 ECTS studijskih bodova ili drugog ili trećeg ciklusa Bolonjskog sistema studiranja, završen pravni fakultet ili fakultet za kriminalistiku, kriminologiju i sigurnosne studije, ili fakultet političkih nauka-odsjek sigurnosnih studija, ili

druge visokoobrazovne institucije pravne, kriminalističke, kriminološke i sigurnosne struke, najmanje pet godina radnog staža u struci u ovim oblastima nakon sticanja visoke školske spreme,

- c) nije član političke stranke,
d) nije bilo imenovano na bilo kojoj poziciji u političkoj stranci na bilo kojem nivou, niti je bilo postavljeno na bilo koju poziciju od strane političke stranke,
e) nije bilo član izvršnog ili zakonodavnog tijela na bilo kojem nivou vlasti u Bosni i Hercegovini,
f) nije osuđivano za krivično djelo,
g) protiv kojeg se ne vodi krivični postupak,
h) kojem nije izrečena disciplinska sankcija za teže povrede službene dužnosti,
i) koje nije aktivni policijski službenik,
j) koje nije istovremeno član dva odbora organa unutrašnjih poslova ili drugih policijskih agencija na bilo kojem nivou u Bosni i Hercegovini."

Član 7.

(Izmjena člana 29.)

U članu 29. u stavu (5) broj: "34/03" zamjenjuje se brojevima "12/03, 34/03 i 65/13."

Član 8.

(Izmjena člana 30.)

U članu 30. u stavu (2) riječi: "Skupština Kantona" zamjenjuju se riječima: "nadležna komisija Skupštine Kantona Sarajevo."

Član 9.

(Izmjena člana 31.)

U članu 31. u stavu (1) tačka c) mijenja se i glasi:

"(c) neopravdano ne prisustvuje na tri sjednice Nezavisnog odbora u toku kalendarske godine."

Član 10.

(Izmjena i dopune člana 33.)

- (1) U članu 33. tačka c) mijenja se i glasi:
"c) prati rad policijskog komesara, nadzire primjenu ovlaštenja policijskog komesara u rukovođenju Upravom policije iz člana 23. ovog zakona i o tome izvještava Skupštinu Kantona Sarajevo."
- (2) Iza tačke c) dodaje se nova tačka d) koja glasi:
"d) ako procijeni za potrebnim može izvršiti neposredni uvid u akte i predmete Uprave policije u skladu sa članom 47. ovog zakona"
- (3) Dosadašnje tačke d, e, f, g, h, postaju e, f, g, h, i.
- (4) Iza tačke i), dodaje se nova tačka j) koja glasi:
"j) po potrebi razmjenjuje informacije, podatke, dokumente po pojedinim predmetima sa Komisijom za sigurnost Skupštine Kantona Sarajevo."

Član 11.

(Izmjena člana 34.)

U članu 34. u stavu (1) brišu se riječi: "na koji saglasnost daje Skupština Kantona".

Član 12.

(Izmjena i dopuna člana 35.)

- (1) U članu 35. tačka c) mijenja se i glasi:
"c) da ima stečenu diplomu visokog obrazovanja ili druge obrazovne ili akademske kvalifikacije najmanje VII stepen stručne spreme, odnosno visoko obrazovanje prvog ciklusa Bolonjskog sistema studiranja sa 240 ECTS studijskih bodova ili drugog ili trećeg ciklusa Bolonjskog sistema studiranja, završen pravni fakultet ili fakultet za kriminalistiku, kriminologiju i sigurnosne studije, ili fakultet političkih nauka-odsjek sigurnosnih studija, ili druge visokoobrazovne institucije pravne, kriminalističke, kriminološke i sigurnosne struke."
- (2) Tačka d) mijenja se i glasi:

- "d) da ima čin glavnog inspektora;"
(3) U tački i) riječi: "u posljednjih pet godina" brišu se.
(4) U tački j) riječi: "u posljednjih pet godina" brišu se.
(5) Iza tačke k) dodaje se tačka l) koja glasi:
"l) da nije smijenjen s mjesta policijskog komesara."

Član 13.

(Izmjena člana 36.)

U članu 36. stav (2) mijenja se i glasi:

- "(2) Postupak odabira novog policijskog komesara mora započeti najkasnije tri mjeseca prije isteka mandata policijskog komesara odnosno odmah, a najkasnije tri mjeseca nakon pravosnažnosti odluke o smjeni ili od pravosnažnosti odluke o izrečenoj disciplinskoj sankciji (prestanak radnog odnosa)."

Član 14.

(Dopune člana 45.)

- (1) U članu 45. iza stava (1) dodaju se novi st. (2) i (3) koji glase:

- "(2) Policijski komesar dužan je prisustvovati sjednicama Nezavisnog odbora, na koje se pismeno poziva od strane predsjednika Nezavisnog odbora.
(3) U slučaju nemogućnosti prisustvovanja sjednici Nezavisnog odbora policijski komesar je dužan obavijestiti predsjednika Nezavisnog odbora koji sjednicu može odložiti ili donijeti odluku da će se ista održati bez prisustva policijskog komesara."

- (2) Dosadašnji st. (2) i (3) postaju st. (4) i (5).

Član 15.

(Dopune člana 46.)

U članu 46. dodaju se novi st. (6) i (7) koji glase:

- "(6) Ukoliko je policijski komesar smijenjen, osim u slučaju iz člana 48. stav (1), tač. a) i b) ovog zakona, ili mu je radni odnos prestao na osnovu disciplinske sankcije smatra se da je za godinu u kojoj su nastupili navedeni događaji ocijenjen ocjenom "ne zadovoljava".
(7) Policijski komesar koji nije imenovan na početku godine ocijenit će se za period rada u godini od kada je imenovan do 31.12. te godine u proceduri utvrđenoj u stavu (1) ovog člana."

Član 16.

(Izmjena i dopuna člana 51.)

- (1) U članu 51. stav (1) mijenja se i glasi:

- "(1) Policijski komesar je disciplinski odgovoran za povrede službene dužnosti utvrđene u članu 52. ovog zakona koje nastaju kao rezultat njegove radnje, nečinjenja ili propuštanja da postupi na adekvatan način."

- (2) Iza stava (3) dodaje se novi stav (4) koji glasi:

- "(4) Donošenjem rješenja o pokretanju disciplinskog postupka Vlada Kantona Sarajevo na prijedlog ministra unutrašnjih poslova može donijeti rješenje o suspenziji policijskog komesara."

Član 17.

(Dopune člana 52.)

- (1) U članu 52. tačka d) iza riječi: "utiču", dodaju se riječi: "ili su mogli uticati."

- (2) Iza tačke o) dodaje se nova tačka p) koja glasi:

- "p) ukoliko Nezavisnom odboru ne dostavlja tražene informacije i druge akte u skladu sa članom 47. ovog zakona, odmah, a najkasnije u roku od 15 dana."

Član 18.

(Izmjena člana 56.)

- (1) U članu 56. stav (1) tačka a) briše se.

- (2) Stav (2) se briše.

- (3) Stav (3) mijenja se i glasi:

- "(3) Disciplinska sankcija prestanak radnog odnosa može se izreći samo u slučaju kada se ocijeni da su izvršene

povrede takve prirode da je prestanak radnog odnosa jedina odgovarajuća disciplinska sankcija."

Član 19.

(Izmjena i dopuna člana 64.)

- (1) U članu 64. stav (1) mijenja se i glasi:

- "(1) Odbor za žalbe javnosti (u daljem tekstu: Odbor) se osniva kao nezavisno tijelo Skupštine Kantona koje čine pet članova predstavnika građana

- (2) Iza stava (3) dodaje se stav (4) koji glasi:

- "(4) Član Odbora za žalbe javnosti može biti svako lice koje:

1. je državljanin Bosne i Hercegovine
- b) ima stečenu diplomu visokog obrazovanja ili druge obrazovne ili akademske kvalifikacije najmanje VII stepen stručne spreme, odnosno visoko obrazovanje prvog ciklusa Bolonjskog sistema studiranja sa 240 ECTS studijskih bodova ili drugog ili trećeg ciklusa Bolonjskog sistema studiranja, završen pravni fakultet ili fakultet za kriminalistiku, kriminologiju i sigurnosne studije, ili fakultet političkih nauka-odsjek sigurnosnih studija, ili druge visokoobrazovne institucije pravne, kriminalističke, kriminološke i sigurnosne struke, najmanje pet godina radnog staža u struci u ovim oblastima nakon sticanja visoke školske spreme, a predsjedavajući deset godina radnog staža u struci nakon sticanja visoke školske spreme,
- a) nije član političke stranke,
- b) nije bilo na bilo kojoj poziciji u političkoj stranci na bilo kojem nivou, niti je bilo postavljeno na bilo koju poziciju od strane političke stranke,
- c) nije bilo član izvršnog ili zakonodavnog tijela na bilo kojem nivou vlasti u Bosni i Hercegovini,
- d) nije osuđivano za krivično djelo,
- e) da se protiv njega ne vodi krivični postupak,
- f) da mu nije izrečena disciplinska sankcija za teže povrede službene dužnosti,
- g) nije aktivni policijski službenik"

- (3) Dosadašnji stav (4) postaje stav (5).

- (4) U stavu (5) riječi: "Skupština Kantona" zamjenjuju se riječima: "nadležna komisija Skupštine Kantona Sarajevo."

Član 20.

(Dopuna člana 66.)

- (1) U članu 66. u stavu (1) dodaje se tačka l) koja glasi:

- "l) može da traži reviziju po određenim predmetima o čemu će obavijestiti Komisiju za sigurnost;"

- (2) Dosadašnja tačka l), postaje tačka m).

Član 21.

(Izmjena člana 70.)

U članu 70. st. (1) i (2) mijenja se i glasi:

- "(1) Članovi odbora biraju se iz reda istaknutih stručnjaka iz oblasti pravnih, kriminoloških, kriminalističkih i sigurnosnih nauka, sa najmanje pet godina radnog staža nakon sticanja visoke školske spreme, a predsjedavajući odbora mora imati najmanje deset godina radnog iskustva na pravnim ili kriminalističkim poslovima".

- (2) Odredbe Zakona o ministarskim, vladinim i drugim imenovanjima Federacije Bosne i Hercegovine ("Službene novine Federacije BiH", br. 12/03, 34/03 i 65/13), se primjenjuju na izbor članova Nezavisnog odbora, ukoliko nije drugačije određeno ovim zakonom."

Član 22.

(Izmjena člana 71.)

U članu 71. u stavu (3) riječi: "Zakonom o državnoj službi u Federaciji Bosne i Hercegovine" zamjenjuju se riječima: "Zakonom o državnoj službi u Kantonu Sarajevo."

Član 23.

(Dopuna člana 77.)

U članu 77. iza stava (2) dodaje se stav (3) koji glasi:

"(3) Ministar može izuzetno, za postignuti uspjeh u vršenju njihovih poslova priznanja, pohvale i druge nagrade dodijeliti rješenjem policijskim službenicima."

Dosadašnji stav (3) postaje stav (4).

Član 24.

(Izmjena i dopuna člana 94.)

(1) U članu 94. stav (2) mijenja se i glasi:

"(2) Pravilnik o unutrašnjoj organizaciji Ministarstva (član 16. zakona) ministar unutrašnjih poslova uskladit će s odredbama ovoga zakona i donijeti uz saglasnost Vlade Kantona Sarajevo u roku od šest mjeseci od dana stupanja na snagu ovoga zakona."

(2) Iza stava (2) dodaju se st. (3) i (4) koji glase:

"(3) Pravilnik o uvjetima za imenovanje i razrješenje članova Odbora za žalbe javnosti (član 70. zakona) ministar unutrašnjih poslova uskladit će s odredbama ovoga zakona u roku od tri mjeseca od dana stupanja na snagu ovoga zakona.

(4) U Pravilniku o unutrašnjoj organizaciji Ministarstva, za radna mjesta zatečenih policijskih službenika koji po odredbama ovog zakona i zakona koji reguliše radno-pravni status policijskih službenika ne ispunjavaju uvjete za vršenje poslova, koji uključuju vrstu i stepen stručne spreme, u djelu sistematizacije radnih mjesta, kojim se uređuju elementi radnog mjesta, a odnose se na uvjete za vršenje poslova, uključujući vrstu i stepen stručne spreme i čin, pored uvjeta propisanih ovim zakonom, sa naznakom "a za zatečene policijske službenike" uređuju se uvjeti za vršenje poslova, uključujući vrstu i stepen stručne spreme i čin koje posjeduju zatečeni policijski službenici."

Član 25.

(Izmjena člana 95.)

Član 95. mijenja se i glasi:

"Član 95.

(Prelazne odredbe o imenovanju policijskog komesara, Nezavisnog odbora i Odbora za žalbe javnosti)

(1) Izuzetno od odredbi čl. 29., 35. i 70. zakona, policijski komesar, članovi Nezavisnog odbora i Odbora za žalbe javnosti (Ured za pritužbe javnosti, imenovani na tu poziciju u skladu sa zakonima i drugim propisima koji su bili na snazi prije stupanja na snagu ovog zakona ostaju na toj poziciji do isteka svog mandata.

(2) Dva člana Odbora za žalbe javnosti biće imenovani u roku od dva mjeseca od dana stupanja na snagu ovog Zakona.

(3) Stupanjem na snagu ovog zakona članovima Nezavisnog odbora koji su članovi Nezavisnog odbora organa unutrašnjih poslova ili drugih policijsko sigurnosnih agencija na bilo kom nivou u Bosni i Hercegovini prestaje mandat."

Član 26.

(Izmjena člana 96.)

U članu 96. riječi: "Zakonom o državnoj službi u Federaciji Bosne i Hercegovine" zamjenjuju se riječima: "Zakonom o državnoj službi u Kantonu Sarajevo".

Član 27.

(Stupanje na snagu)

Ovaj zakon stupa na snagu osmog dana od dana objavljivanja u "Službenim novinama Kantona Sarajevo."

Broj 01-02-24857/19
19. juna 2019. godine
Sarajevo

Predsjedavajući
Skupštine Kantona Sarajevo
Elmedin Kanaković, s. r.

Na osnovu čl. 117. i 175. Poslovnika Skupštine Kantona Sarajevo ("Službene novine Kantona Sarajevo", broj 41/12 - Drugi novi prečišćeni tekst i br. 15/13, 47/13, 47/15 i 48/16), Skupština Kantona Sarajevo, na sjednici održanoj dana 19.06. 2019. godine, na prijedlog Zakonodavno-pravne komisije Skupštine Kantona Sarajevo za davanje autentičnog tumačenja člana 138. stav 7. Zakona o visokom obrazovanju ("Službene novine Kantona Sarajevo", broj 33/17), iniciran od strane Univerziteta u Sarajevu, usvaja/donosi

AUTENTIČNO TUMAČENJE

ODREDBE ČLANA 138. STAV 7. ZAKONA O VISOKOM OBRAZOVANJU

1. Odredba iz člana 138. stav 7. Zakona o visokom obrazovanju o izboru novog rukovodioca organizacione jedinice shodno se primjenjuje i kada Upravni odbor Univerziteta u Sarajevu iz razloga propisanih odredbama člana 154. stav 10.a-f donosi odluku o prijevremenom razrješenju rukovodioca organizacione jedinice.

Izbor novog rukovodioca organizacione jedinice znači da se bira nova osoba za rukovodioca organizacione jedinice i da se ne može ponovo birati ni izabrati osoba koja je prijevremeno razriješana dužnosti rukovodioca organizacione jedinice, ako je na snazi odluka o prijevremenom razrješenju te osobe.

2. Autentično tumačenje predstavlja integralni dio teksta ovog Zakona, primjenjuje se i važi od dana primjene člana 138. stav 7. Zakona o visokom obrazovanju ("Službene novine Kantona Sarajevo", broj 33/17) i objavit će se u "Službenim novinama Kantona Sarajevo".

Broj 01-05-24880-1/19
19. juna 2019. godine
Sarajevo

Predsjedavajući
Skupštine Kantona Sarajevo
Elmedin Konaković, s. r.

Vlada Kantona Sarajevo

Na osnovu čl. 26. i 28. stav (2) Zakona o Vladi Kantona Sarajevo ("Službene novine Kantona Sarajevo", broj 36/14 - Novi prečišćeni tekst i 37/14 - Ispravka) i člana 29. Zakona o ustanovama ("Službeni list RBiH", br. 6/92, 8/93 i 13/94), Vlada Kantona Sarajevo je, na 26. vanrednoj sjednici održanoj 17.06.2019. godine, donijela

ODLUKU

O DAVANJU SAGLASNOSTI NA ODLUKU UPRAVNOG ODBORA JAVNE USTANOVE "SLUŽBA ZA ZAPOŠLJAVANJE KANTONA SARAJEVO" SARAJEVO O RAZRJEŠENJU VRŠIOCA DUŽNOSTI DIREKTORA JAVNE USTANOVE "SLUŽBA ZA ZAPOŠLJAVANJE KANTONA SARAJEVO" SARAJEVO

I

Daje se saglasnost na Odluku Upravnog odbora Javne ustanove "Služba za zapošljavanje Kantona Sarajevo" Sarajevo broj 09/I-1149-UO/19 od 07.06.2019. godine, kojom se Muhammed Bekto vršilac dužnosti direktora Javne ustanove "Služba za zapošljavanje Kantona Sarajevo" Sarajevo, razrješava dužnosti.

II

Odluka Upravnog odbora Javne ustanove "Služba za zapošljavanje Kantona Sarajevo" Sarajevo iz tačke I ove Odluke primjenjuje se danom dobijanja saglasnosti od strane Vlade Kantona Sarajevo.

III

Ova Odluka stupa na snagu danom donošenja i objavit će se u "Službenim novinama Kantona Sarajevo".

Broj 02-05-24378-1.1/19
17. juna 2019. godine
Sarajevo

Premijer
Edin Forto, s. r.